



DOSM terbitkan siri keenam My Local Stats 2022

Jabatan Perangkaan Malaysia (DOSM) hari ini menerbitkan siri keenam My Local Stats 2022 sejak 2017 yang mengintegrasikan statistik sosial dan ekonomi hingga ke peringkat daerah pentadbiran dari 2020 hingga 2022.

Penerbitan My Local Stats, yang merupakan input penting untuk pembangunan sosioekonomi itu merangkumi seluruh negara, 13 penerbitan negeri dan tiga penerbitan Wilayah Persekutuan serta 156 daerah pentadbiran.

"Ketersediaan statistik di peringkat tempatan yang lebih terperinci memberi manfaat kepada kerajaan negeri dan daerah dalam menambah baik dasar dan program serta keperluan sosioekonomi rakyat," menurut DOSM dalam kenyataan hari ini.

DOSM memaklumkan data terperinci yang tersedia hingga peringkat daerah dapat menjadi input yang lebih baik dalam penyediaan perancangan yang lebih bersasar.

Penerbitan My Local Stats meliputi 12 bidang sosial dan lapan bidang ekonomi iaitu maklumat asas, penduduk, perumahan, guna tenaga, pendapatan dan perbelanjaan, pendidikan, kesihatan, perkhidmatan kebajikan, keselamatan awam, pelancongan, pengangkutan dan rekreasi, Internet dan media sosial, kemudahan asas, keluaran dalam negeri kasar (KDNK), indeks harga pengguna, eksport dan import, pertanian, perlombongan dan pengkuarian, pembuatan, pembinaan dan perkhidmatan. Penerbitan berkenaan mengandungi 18 jadual baharu di peringkat nasional, enam peringkat negeri dan empat peringkat daerah pada 2022.

"Penerbitan ini dapat dijadikan rujukan dalam membuat perancangan di peringkat kerajaan tempatan dari segi penyediaan fasiliti awam, penambahbaikan perkhidmatan kebajikan dan meningkatkan tempat kediaman mampu milik," katanya.

DOSM memaklumkan statistik terperinci berkenaan diperlukan dalam mengurusperdanakan sasaran sosioekonomi negara bagi pembangunan inklusif dan memastikan pertumbuhan ekonomi yang mampan dengan menitikberatkan kesejahteraan rakyat.

Dalam kenyataan sama, Ketua Perangkawan Datuk Seri Dr Mohd Uzir Mahidin berkata antara penemuan utama dari segi demografi menunjukkan jumlah penduduk Malaysia pada 2022 dianggarkan 32.7 juta dengan 92.4 peratus terdiri daripada warganegara dan 7.6 peratus bukan warganegara.

Berdasarkan anggaran penduduk semasa pertengahan 2022, Petaling, Selangor merupakan daerah mempunyai jumlah penduduk tertinggi iaitu 2.30 juta diikuti Johor Bahru, Johor (1.72 juta) dan Hulu Langat, Selangor (1.41 juta).

Mohd Uzir berkata berdasarkan penemuan dalam bidang Internet dan media sosial, peratusan capaian isi rumah kepada Internet di Malaysia ialah 96 peratus pada 2022.

Dari segi kemudahan Internet di peringkat daerah, Hulu Langat mencatatkan peratusan capaian isi rumah kepada Internet tertinggi iaitu 100 peratus diikuti oleh Sepang, Selangor 99.9 peratus dan Gombak, Selangor 99.7 peratus.

Daripada 156 daerah pentadbiran di Malaysia, katanya 38 daerah pentadbiran mencatatkan peratusan capaian isi rumah kepada Internet di bawah 90 peratus.

Dari segi tenaga buruh, Klang, Selangor mencatatkan kadar penyertaan tenaga buruh (KPTB) tertinggi di peringkat daerah sebanyak 78.6 peratus diikuti oleh Petaling (78.5 peratus) dan Beluran, Sabah (78.3 peratus).

Mengenai perkhidmatan kebajikan, di peringkat daerah, Johor Bahru merekodkan bilangan kumulatif Orang Kurang Upaya (OKU) yang berdaftar tertinggi iaitu 44,998 orang diikuti Petaling (32,534 orang) dan Klang (19,241 orang).

Beliau berkata seramai 535,321 orang di Malaysia telah menerima bantuan daripada Jabatan Kebajikan Masyarakat, dengan Sabah mencatatkan bilangan penerima bantuan tertinggi pada 2022 iaitu 63,932 orang, diikuti Johor 54,536 orang dan Sarawak 52,516 orang.

Statistik perumahan di peringkat daerah, katanya menunjukkan Petaling mempunyai jumlah tempat kediaman tertinggi pada 2022 iaitu 715,600 unit diikuti Johor Bahru (664,700) dan Hulu Langat (455,200).

<https://www.bernama.com/bm/news.php?id=2248461>